

Hvala Allahu, Gospodaru svjetova! Salavat i selam neka je na Allahova poslanika, Muhammeda, s.a.v.s., njegovu porodicu, ashabe i sve one koji ga slijede na putu islama! Poštovana braćo i sestre, draga djeco i omladino, esselamu alejkum!

U Kur'anu Kerimu imamo mnogo primjera koje Uzvišeni Allah navodi ljudima koji razmišljaju i primaju pouku.

To potvrđuju i riječi Allaha, dž.š.: „**Mi u ovom Kur'anu navodimo ljudima svakojake primjere da bi pouku primili.**“ (Ez-Zumer, 27)

Neki primjeri se odnose na ljudsku škrtost i pohlepu, neki na pogrešna vjerovanja i svjetonazore, a neki imaju i naučne dimenzije čija značenja nauka tek u moderno doba otkriva i još će, ako Bog da, otkrivati.

Danas želim sa vama podijeliti mudrosti i pouke iz dva kur'anska ajeta;

Prvi ajet je iz sure Junus: „**Život na ovome svijetu je sličan zemaljskom bilju na koje Mi spustimo s neba kišu s kojim se ona izmiješa, kojim se onda hrane ljudi i stoka. Pa kad se Zemlja ukrasi svojim ruhom i**

okiti i kad stanovnici njezini pomisle da su oni toga gospodari, dođe zapovijed Naša, noću ili danju, i Mi to pokosimo, kao da prije ničeg nije ni bilo. Eto, tako Mi potanko izlažemo dokaze narodu koji hoće da razmisli.“ (Junus, 24)

Prvo što možemo ovdje primijetiti jeste usporedba života na ovom svijetu sa kišom koju Uzvišeni Allah spušta sa neba. Znamo da je život na ovom svijetu prolazan, pa tako i kiša ima svoj početak i kraj. Poslije kiše biljke zazelene i rastu ali na kraju požute i sasuše se. Ljudi, gledajući biljke u raznim oblicima, bojama i mirisima pomisle: Kako to može proći?! Kako se takva raskoš može izbljediti i nestati?!

Braćo i sestre, i dunjaluk na isti način zavodi čovjeka da pomisli da će vječno na njemu ostati, da je daleko smrt i polaganje računa, odnosno, da zaboravi na njegovu prolaznost. Stoga nas Allah, dž.š., upozorava: „**O ljudi, Allahovo obećanje je, zaista, istinito, pa neka vas nikako život na ovome svijetu ne zaslijepi i neka vas šejtan u Allaha ne pokoleba!**“ (Fatir, 5)

U ovom ajetu vidimo da se kiša spušta, zatim miješa sa zemljom i tu ostaje neko vrijeme, pa biljke počinju rasti i bujati.

Isto tako i ljudi, da bi zaradili i stekli nešto što im je korisno trebaju da ulože trud, rad i često se namuče, jer ništa neće samo od sebe, kao što biljke ne rastu bez kiše, tako i rezultati ne stižu bez uloženog truda.

Sljedeće što možemo primijetiti kada Uzvišeni uspoređuje život na ovom svijetu sa kišom koju spušta sa neba jeste brza promjena stanja, danas je bilje zeleno a već sutra sasušeno, danas je vrijeme vedro a već sutra grmljavina i oblaci sa kišom, tako isto ono što danas steknemo i zaradimo na ovom svijetu nije garant da sutra nam neće trebati za lijekove, za popravak auta, za nešto neplanirano i nepredviđeno.

U drugom ajetu kojeg danas želim sa vama podijeliti, Uzvišeni Allah, kaže: „**Navedi im kao primjer da je život na ovome svijetu kao bilje, koje i poslije natapanja vodom, koju Mi s neba spuštamo, ipak postane suho, i vjetrovi ga raznesu. A Allah sve može!**“ (El-Kehf, 45)

Braćo i sestre, Uzvišeni Allah, navodeći primjer ovoga svijeta uspoređuje ga sa vodom koju sa neba spušta ne ukazuje samo na prolaznost ovoga svijeta i njegovu varljivu raskoš. Iz ovih ajeta vidimo i to da će sjemenke i biljke najbolje uspijevati i plod dati samo ako je kiša koja se spušta sa neba u umjerenim količinama.

Pouka iz ovog ajeta je da ako mi trčeći za dunjalukom gledamo samo na to koliko ćemo nagomilati dobara ovoga svijeta, a ne gledamo koliko ćemo udijeliti i pomoći onima kojima je pomoć potrebna, da sličimo na kišu koja neprestano pada i koja na kraju donese poplavu i klizišta. Da li od takve kiše ima koristi?! Da li će nam takav život donijeti dobro i oprost na ahiretu?!

Također znamo da se kiša koju Uzvišeni Allah sa neba spušta skuplja i slijeva u potoke i rijeke, i da ti potoci i rijeke neprestano teku i da ih mi ne možemo zaustaviti, tako gledajmo i da od života na ovome svijetu uzmemo samo ono što nam treba i što nam je od koristi, a pri tom da ne zaboravimo na obaveze koje nam je

Uzvišeni Allah propisao, i pustimo dunjaluk da prolazi kao rijeka, mi ga ne možemo zaustaviti. Siguran sam, braćo i sestre, da je svako od vas više puta u životu pokisao zbog kiše ili pljuska koji je naglo naletio. Isto tako, nemojmo se nadati da ćemo živjeti na ovom svijetu a da nas ponekad, naglo i neočekivano ne stignu iskušenja koje nam je Allah propisao da će nas stići, jer kao što se ne možemo izmaći kapima kiše, isto tako, ono što nam je propisano, ne može nas mimoići.

Završit ću sa sljedećim hadisom poslanika s.a.v.s. kojeg bilježi Tirmizi: „**Budi na ovom svijetu kao da si stranac ili putnik.**“

Molim Uzvišenog Allaha da nam da dobro ovoga i budućeg svijeta, da nam se smiluje, oprost i grijeha i uvede u Džennet sa onima sa kojima je zadovoljan.

Amin!

Prethodne hutbe potražite na: www.medzlis-split.org
Pripremio: Vahid ef. Hadžić na temelju
hutbe hfz. Nezim ef. Ruhida
Split, 28.9.2018.

